






Casella N° 78-18






101









EMIN.<sup>MO</sup> AC REV.<sup>MO</sup> PRINCIPI  
D. A L V A R O

E SOC. JESU

S. R. E.

CARDINALI CIENFUEGOS  
ARCHIEPISCOPO MONTIS-REGALIS

GERMANIÆ COMPROTECTORI

SAC. CÆS. CAT. MAJESTATIS

CONSILIARIO INTIMO

ET APUD SANCTAM SEDEM LEGATO

JOSEPH PERUS MEDIOLANENSIS

*Se suamque Theologicam Lauream*

IN ACADEMIA BRAYDENSI

Societatis JESU

SIBI COLLATAM

Anno MDCCXXVI.

D. D. D.



M E D I O L A N I

---

Ex Typographia Josephi Pandulphi Malatestæ.  
*Superiorum permissu.*







# EMIN.<sup>ME</sup> PRINCEPS.<sup>3</sup>



*Heologicâ initiandus laureâ non tam me tibi sisto PRINCEPS EMINENTISSIME, quàm te ipsum tibi. Veritus, ne audaciâ clientis suboffensus ejusdem fastidio capere, Prometheus primo in diagrammate inscripti nominis vindicem proponendum tibi statui. Ex eo intelliges, cur tantum splendoris, ac ornamenti laurea huic mea arcefferem, teque à gravissimis curis evocatum eidem Mecænatem inscriberem. Nunquam verosimilius lusi Fabula; Et quæ mortalium animos exprimit morum magistra Poësis, in Prometheo sibi eximia virtutis heroem effingens, evoluta fabula cortice, te unum visa est indicasse. Quemadmodum enim in Prometheo animi amplitudo, æquitatis amor, ac futuri provida mens adumbratur, quod ait Zetes interpret fabularum; quemadmodum insuper è celo ignem abstulisse idem dicitur, quod rerum divinarum, ac philosophiæ cognitione cacutientes terras omnium primus illustravit; primus-*



que ipse oculos mortalium ad contemplan-  
 da cœlestium corporum arcana  
 ingenito quodam tum meditando, tum  
 suadendi ardore impulerit, ut  
 olim sensit Theophrastus: ita qui sis,  
 Antistes Amplissime, quæ sit opi-  
 nio nominis tui, quantumve terris  
 sidus affulgeas, substans imagini tuæ  
 Prometheus velut è tuo vultu ac sinu  
 ejaculaturus ignes explicabit.  
 Agnosces aliquandò quem notum omni-  
 bus, tandiù ignotum tibi uni vo-  
 luit modestia tua. Et sanè quam  
 tibi mentem tot diversarum rerum  
 moderatricem, summoque parem Orbi  
 intelligentiam Superi concesserunt!  
 Qui te propius noverunt, vident à  
 gravissimis muneribus ad alia  
 demigrantem, ac velut integrum à  
 labore meditantem, ac obeuntem  
 majora. Vident animum sub nullâ  
 occurrentium ex improvviso difficul-  
 tatum mole fatiscentem, nunquam  
 solutum, eodem semper impetu no-  
 va, ac difficillima quaque felicissimè  
 arripientem. Ulyssiponem Caroli  
 Hispaniarum Regis Orator ingressus  
 ut statim tibi Urbis obsequia,  
 Aula plausus, amoremque concilia-  
 sti? Difficillimis temporibus suprema  
 cum potestate, quod nulli ante te  
 contigit, apud Lusitanum Regem,  
 tum ipsius Caroli, tum Augustæ  
 Matris nomine, penitiora & belli,  
 & pacis negotia procurasti; eo  
 Principum favore, ac laude, ut  
 Austriaci spes imperii uni propè  
 tibi credita esse videretur. Romanam  
 modo pro Cæsare legationem obis;  
 quâ in tractandis negotiis sedulitate,  
 quâ felicitate, ac maturitate in  
 deliberandis, qua Summorum  
 Pontificum, Italiaque universa de  
 te concepta opinione, abundè tot  
 annis prædicat Fama, quæ nec diu  
 sibi constare, nec in idem tandiù  
 consentire potuisset, nisi virtute  
 tuâ ipsius invidiam, ac præconia  
 superasses. Atque non semel illa  
 se laudibus tuis imparem testata  
 est, tuæque mentis amplitudine  
 victam. Quoties suspexit aciem  
 ingenii tui, ardoremque in  
 penetrandis adytis natura, ignis  
 in movem omnia celerrimè  
 pervadentis? In Salmanticensi  
 Lyceo primos divina ratiocinatricis  
 facultatis gradus occupasti: Quanto  
 Auditorum numero ex Hispania  
 universa ad te unum conflante! Is  
 certè eâ clarissimâ in gente  
 ingenii tui percrebuerat rumor,  
 ut sacras explicaturus ambages  
 raperes unus Sapientium  
 populum, & Hispanienses  
 Athenas. Exinde Triadis  
 augustissima arcana My-  
 steria, inaccessamque  
 Divinitatis caliginem ingressus,  
 ea investigasti tam acri  
 ingenii tentamento, ut  
 Literatorum Respublica  
 magnanimos ausus tuos, &  
 felicissima inventa miretur,  
 tibi publico Fama præconio  
 novam Theologica scientiæ  
 additam lucem æternum gra-  
 tulatura. Facultatibus  
 contemplatricis animæ  
 addidisti ætenuiorum  
 studia literarum. Poësim  
 adeò amasti, ut tibi tot  
 publicis curis distento,



occupatoque adhuc pateant Castalii fontes. Crebris per hortulos Poëtarum privata etiam inter colloquia excursionibus, passim interseris exquisitiores Musarum delicias, pari aurium oblectamento, ac fructu animorum. Verum nunquam propius ignes gentilitios es imitatus, nunquam te suspexit utiliùs Hispania, quàm cum te vidit vel aureo facundia imbre insnuantem animis mortalium virtutis amorem, vel magnis eloquentia fulgetris adversus vitia detonantem. Et libri à te perenni gentium beneficio editi, & familiaria passim colloquia inflammata sacro pietatis ardore testantur adhuc, quantum valeas facultate dicendi. Quamobrem iterum à te revocor in Lusitaniam, cum, inter publica regia legationis officia, magisterium aggressus animorum, Nobilium pauperum cœtum sumptibus tuis institutum, celeberrimi Cardinalis Ximenii emulatur egregius ad severioris vitæ leges hortabare. Ut illustres animas nativo eloquentiæ genere tibi calitùs concessio percellerbas! easque jam Numinis capaces, & ad perfectam, cumulatamque virtutem excultas in divina volentes abripiebas! admirante Ulyssipone non minùs munificentiam animi, tot ac tanta in Dei gloriam irrogantis, quàm presentem adeò, ac singularem vim persuadendi. Hæc tibi de te in hujusce inaugurationis diagrammate Prometheus, Eminentissime Princeps. Quamquam nondum in eo totus cognosceris. Est enim Virum illum egregium ad infima quaque virtutis amore sese dejicientem, & mortalium beneficio omnia munificè profundentem græco carmine Æschylus celebraverit, quantulam tamen idcirco tui partem Prometheus representat! Vix ex Aula strepitu, atque splendore, adhuc religiosæ adscriptus familiæ in sacrum Societatis recessum te proripiebas, ut non amplius Orator regius, non amplius Caesaris favore conspicuus viderere. Oblitus qui nuper fueras, te tibi, tuisque redditum latitare: obibas alacer dejectiora domus officia: agrotantibus aderas frequens, eorumque munera letus implebas. Extant adhuc, qui te alium domi, alium in aula conspicati quærent attonitis similes, an ille esses Alvarus, cui nuper Viri Principes, & Regia plauderet universa. Adeò magnanimitatis aquas officia, ut munera utriusque sortis admiraculum propè occupaveris. Verum prodat demum sese mitissima illa comitas, & in amplissimo Principe mira illa morum suavitas; prodat, inquam, sese tanta humanitati comes, quæ tota plane tua est, beneficentia, quaque tantum in te eminet, quantum ceteras inter virtutes splendore suo oculos ad se omnium trahit. Hæc tecum nata te ad hunc dignitatis apicem evexit, ut omnibus prodesse, Nihil habes, quod reputes tuum; hoc




unum tamen unicè tuum, ut omnibus prodesse velis; atque ita interdum prosis, ut ne tibi quidem reserves, quo in posterum possis: licet singulari quodam beneficentia prodigio nunquam tibi desit, quo inexhaustam, inexpletamque probes indolem benemerendi. Qua quidem omnia cum sublimiora sint, quàm ut representari penitus à Prometheo possent, veram Gloriam, quam rerum gerendarum auspicem, ac administram adhibes, Philosopho illi prorsus ignotam, perpetuam tibi comitem, & adjutricem, insignibus tuis adstantem posui. Hæc vultus tuos, ignesque gentilitios respectans, & mirata quantum sibi fingendum ad cœlestia heroem natura dedisset, Moderatrix ipsa operis, ac Arbitra, nativæ decora, præmia fortuna, reliquasque egregias dotes, ingenio, ac exercitatione à te comparatas ad ea instituit munera, quæ te Prometheo longè majorem, admirandum omnibus, cæteris vix imitandum effecerunt. Quamobrem, Mæcenas amplissime, ut magnum beneficentia tua munus fuit, quod laurea huic mea nomen concesseris, ita alterum adde benevolentia tua, quod me aliquâ ignea tua lucis aspergine irradies, meaque laurea amplissimo nominis beneficio patrocineris. Excipe me, quæ reliquos soles, humanitate; atque hoc munificentia tua auctoramento, quod maxime potes, infere theologica huic laurea perennitatem.





EMINENTISSIMI PRINCIPIS  
NATIVA DECORA  
GENTILITIIS IGNIBUS ADUMBRATA  
PER OMNES  
MULTIFORMIS VITÆ STATUS  
VERÆ GLORIÆ FAMULANTIA  
BRAYDENSES MUSÆ  
EXHIBEBANT.







## NOBILITAS GENERIS?



Pura de Luce .



**V**ividus unde levi surgit crepitante favillâ  
Ignis apex? Aut unde cavo Crystallinus Umbo  
Tanta sinu potuit miracula promere verum?  
Scilicet huc totum pleno se lumine Titan  
Infundit: Puraque inspirans semina flammæ,  
Fœcundos cogit radios; dum tramite recto  
Se virtus Vitreum ferat indeprensa per Orbem,  
Et puros Pura de Luce exsuscitet Ignes.

Longius arcanas nequicquam evolvere causas  
Quid moror, unde tibi Vigor Igneus, *ALVARE*, mentem  
Tantus agat, pulchrisque incendat ad ardua votis?  
Nosse mihi satis est clara decora inclita Stirpis,  
Ingentem rerum seriem, & memoranda tuorum  
Facta Patrum, antiqua deducta ab origine Gentis.



Nam quos non Populos, quas non pervasit ad Urbes  
 Magnanimū Fama Heroum; quos nobilis olim  
 Laudis amor Patria afflictis succurrere rebus  
 Impulit, Hesperios iret cum fœda per Agros  
 Tempestas, Libya Terris effusa cruentis?  
 Nunc etiam Nomadum gemeres, Hispania, duro  
 Pressa iugo; Oceani Borealibus Astur ab Oris  
 Ni ferat auxilium misera, primoque laceffit  
 Marte Libem, Et campis ausus descendere apertis  
 Imbuat ultricem Getulo sanguine dextram.  
 Nempe illinc prima spes affulgere salutis  
 Debit; Hesperia quò Flos confluxerat omnis,  
 Quò veterum Sanguis Regum, Sobolesque potentū  
 Clara Ducum, subito bellorum pulsa tumultu.

Ex illo Proavos jam tum Natura, Patresque  
 Heroum numero tibi legerat, ALVARE: Jam tum  
 Ex illâ tibi Luce Genus, dignumque parabat  
 Stirpe Decus; Patria ut quondam voluentibus annis  
 Gloria nativos animo tibi subderet Ignes.

Abbas Carolus Origus.





# VIS INGENII.



Quò propior Cœlo.



**S**ulphureus primos Calamus vix concipit ignes;  
 Jam fugit, & celerem carpit ad astra viam.  
 Aëriosque supra colles, supra ardua surgens  
 Nubila, spectantùm vanuit ex oculis.  
 Nec se iterum Terris prius ille ostendat opacis,  
 Centena ignivomo quàm pluât Astra sinu.  
 Interea variis cacum secat aërfa spiris,  
 Et multo circum se levis orbe rotat:  
 Intus agens donec sublimem ad sidera flamma  
 Urgeat, & Cœli det regione frui.  
 Hic tandem inclusos ruptis compagibus ignes  
 Evomit, & Vulgi lumina luce rapit.  
 Quò propior Cœlo, radios magis ille comantes,  
 In tremuli morem sideris, axe jacit.

Eminus aethereis certantem dixeris Astris:  
 Flammea tot latè spargit Arundo faces,  
 Haud secus Ingenii primis sublimis ab annis  
 Vis est, MECOENAS, surgere visa tui,  
 Ætatis non illa moras, non ignea metas  
 Passa, per insolitum tendere gaudet iter,  
 Palladiasque Artes, doctæque abstrusa Stagira  
 Culmina nullus erat jam superare labor,  
 Æthereis juvat ire plagis, juvat ardua Cæli  
 Scandere, & arcanas corripuisse vias.  
 Fervida quid memorem celeris luctamina mentis,  
 Ascensu Cælum cum propiore subit?  
 Hic omnes tandem nifus ciet illa: latentes  
 Inter & ambages se jaculata rotat.  
 Cæcæque sacrarum penetrans Mysteria rerum,  
 Haud satis humanis pervia luminibus,  
 Signat iter radiis; Tum largos lucis in imbres  
 Solvitur, Ingenii spargit & Astra tui.  
 Dumque rapit lux illa oculos, animosque tuentium,  
 Abdita quæ Cæli sint adeunda, docet,

Marchio Paulus Camillus de Abdua Prine.





# ANIMI ROBUR. <sup>13</sup>



Vis pellit intus.



**N**Equicquam aheni vincula carceris  
 Ignem coërcent. Ætheris arduos  
 Visura tractus, pervicaces  
     Ipsa moras operosa Flamma  
 Vis pellit intus: Dum loquor; aspicias,  
 Ut astra recto jam subit impetu  
     Ferrata Moles? Ut reclusis  
     Cum sonitu latebris, per auras  
 Concepta latè incendia depluit?  
 Disrupta biatu multiplici procul  
     Fragmenta dissultant: Fragorem  
     Attonitâ bibit aure Vulgus.

A 7

Non

*Non semper alti consilii Viros  
 Magna auspicatos propositi tenax  
 Impellit ardor : Sape in arctis  
 Cæpta cadunt animosa rebus.  
 At, quæ calentis Vis tibi pectoris  
 Occulta fibras permeat, exitum  
 Non illa, MECOENAS, vetantes  
 Victa moras patitur, nec altis  
 Decedit ausis. Rebus in asperis  
 Nunquam remisso se se agit impetus  
 Obnixa Virtus; dum tenacis  
 Cæpta Animi generosa sine  
 Claudat secundo. Perge, per arduos  
 Quò magna casus te rapit Indoles.  
 Trans Bactra Nomen, trans Eoas  
 Fama tibi properabit Oras.*

Dominicus Centurionus ex Coll. Nobilium.





# BENEFICENTIA. <sup>15</sup>



Par millibus una.



**Q**uamprimùm Occiduis Titan demergitur undis,  
 Et Terras velo Nox tegit atra suo;  
 Ecce tibi, Speculis quæ tota micantibus Aula  
 Nuper erat purum vincere visa diem;  
 Jam densis latè tenebris involuitur: Omnis,  
 Quo Pompa ardebat Vitrea, fulgor abit.  
 At medias splendet vix Ignea Teda per umbras,  
 Et radios circum dividit una suos;  
 Protinus acceptâ Crystallina luce Supellex  
 Fulgurat, & multas explicat Aula Faces.  
 Nam velut in Stellas Phœbus se dividit omnes,  
 Damna ferat lucis quin tamen ulla suæ;  
 Haud aliter Speculis donat par millibus una,  
 Quin sua depereat lux sibi, Teda jubar.  
 Jam non innumero mirer Tibi plena Cliente  
 Atria, MECOENAS, munificamque Domum.

*Hæc Animi fecunda tui est, hæc prodiga Dextra  
 Muneribus nunquam Vis minuenda tuis.  
 Nempe illuc inopes fas est accurrere turbas,  
 implet ubi cupidas Copia larga manus.  
 Nec solum tua laus misera succurrere Plebi,  
 Cui pudor est facilem postulare nullus opem;  
 Sed magis ille tua sentit pia munera Dextra,  
 Cui jactura magis lucis acerba sua.  
 Obscuræ quoties noctis quem presserat umbra,  
 Splendori per Te redditus ille suo est.  
 Si videas, satis: Aspectus satis unus in omnes  
 Divos inexhausto lumine fundit opes.  
 Tanta manu Tibi, tanta amplo de Pectore Virtus,  
 Ditandis par vel millibus una, fuit.*

Cornes Hieronymus Cribellus.





# PRUDENTIA:

17



Quà sit iter.



**T**urbida de vexo latè Nox surgat Olympo,  
 Horreat & densis aër, atque unda tenebris:  
 Nimbiferos vasto de carcere liberet Austros  
 Æolus, & sparsas Calo det cogere nubes:  
 Eripiant illa ex oculis radiantia supra  
 Sidera, & Arctos umbrarum abscondat amictu  
 Nigra procella Faces: Certo tamen aquora cursu  
 Nauta secat; modò sublimi procul ardua Turri,  
 Quà sit iter, puro per noctem lumine Flamma  
 Edoceat, Portusque, atque hospita Litora monstret.  
 Scilicet hac illa est, rebus quæ, PRÆSUL, in arctis  
 Pralucet Dux fida Tibi, Vis ignea mentis,  
 Non alacres tantum accendens in pectore vires,  
 Sed certas quoque luce vias, ad prospera donec

*Festines eventa , docens . Caligine cecâ  
 Nequicquam rerum facies obducitur : Atra  
 Nequicquam coeunt circumque , supraque tenebrae ;  
 Ambages quæ mille tegant , facilesque morentur  
 Ad metam cursus : Casus Tibi celsa per omnes  
 Monstrat iter vigili Prudentia lumine fulgens ,  
 Non illa aut nebulis , aut tristi obnoxia nocti ,  
 Externos Alii ductus , aliena secuti  
 Consilia , evadant nigri discrimina ponti .  
 Laus ea jam vulgata . . Tuae Tibi clauditur intus  
 Dux Cynosura via . Felix ! Quem certa per umbras  
 Ducit , & ad tutos Lux dirigit intima Portus .*

Comes Joseph Antonius Caccia .





# AGENDI CELERITAS.<sup>19</sup>



Sonitum prævertit.



**Q**ualis, nube cavâ cum Fulminis ira trifulci  
Ad Terras cadit; ictibus illa  
Prævertit sonitum: Et vastas inopina ruinas  
Ante tulit, quàm corda fragore  
Straverit horrifco, aut Teli græve murmur hiulci  
Attonitas pulsaverit aures:  
Fulmineas talis vires ciet ALVARUS, alta  
Multarum molimina rerum  
Cum superanda sibi aggreditur. Mora nulla: Per omnes  
Ecce volat penetrabilis artes  
Ignea mens: Ductuque priùs perfectâ secundo  
Cœpta vides, quàm nuncia Fama

*Talia tentantis caneret primordia Dextra.*

*Virtutis Vestigia tanta*


*Nequicquam enumeret Tagus, Ister, Duria, Thybris.*

*Gestorum satis ampla tuorum,*

*MECOENAS, monimenta canunt, si Te sua quondam*

*Transvectum prope Litora dicant.*

Comes Maximilianus Spinula ex Coll. Nobilium.





21

# VITA PRIVATA IN SOCIETATE JESU.



**D**um claros alii titulos, atque inclita facta  
Antiqua referunt, Alvaræ Magne, domus,  
Dum vigor ingenii, duris constantia rebus,  
Largaque muneribus dextera, comis amor,  
Cateraque egregiè laudum descripta tuarum  
Obsidet augustum splendida turba Thronum;  
Carminibus, Princeps, non indignabere nostris,  
Demissa ante oculos si tibi Diva venit.  
Non cupit hac plausus, non ambitiosa theatrum,  
Sed tacita, ac tenebris tectâ latere velit;  
Ut fugit exiguo concussa murmure frondis  
Territa, seque cavo pumice condit avis;  
Attamen illa tuam secura intraverat aulam,  
Ut tacitas sylvas, sacraque tectâ solet.  
Nec famulûm obsequiis turbata, aut Principis ostro  
Visa tuo est lateri semper adesse comes.  
Quasieram, timida quæ sit fiducia divæ?  
Musaque sinceris reddidit ista modis.  
Quam petis, hac toto res est celeberrima Cælo,  
Hactenus in terris non tamen illa fuit.  
Conspicuis dives vix viderat Alvarus auras  
Dotibus, & clarâ nobilitate puer,  
Aurea Religio patriis hunc sumpsit ab ulnis,  
Quem sibi formaret, militiaque sua.  
Virtutumque cohors accesserat omnis ut illi  
Jungeret artifices officiosa manus.  
Ornamenta operi divinum lumen, & aura,  
Et nixei mores, ingenuusque pudor.  
Jamque animos pueri dociles experta labore  
Quæque suo, inceptum sollicitabat opus.

Ut celer it molli sculpentis dextera ceras,  
 Ut celer in telis dadala pingit acus,  
 Ultima demisso venit virguncula vultu,  
 Quaeque suas velo cauta tegebat opes,  
 Sed circumspiciens radiantia stemmata mille,  
 Et pueri ardentes pectore mille faces,  
 Fulguraque ex oculis majoris nuncia lucis,  
 Substitit, & nobis bella parantur, ait:  
 Nam, memini, illustres alios ingressa penates,  
 Heu! dolui, primas ingemuique moras;  
 Expulit ambitio nimio me laudis amore;  
 Expulit & pennis turgida fama suis,  
 Magne puer, celebrent alia tua limina diva,  
 Me timidam tantum cogit abire jubar.  
 Jamque pedem referebat: eos sed protinus illi  
 Religio excussit, talibus orsa, metus.  
 Quo fugis? & reliquas cur deseris una sorores?  
 Nulla hic insidia, nullus & hostis erit.  
 Alvarius hanc lucem sub paupere condet amictu,  
 Dum tuus ad Iesu signa vocabit amor,  
 Et licet ingenio magnum mirabitur orbis,  
 Et canet eloquio, consilioque parem;  
 Ille tamen contemptor opum, famaue, suiue,  
 Quà poterit velo se teget usque tuo.  
 Hunc varii casus, hunc splendida munera, Regum  
 Hunc favor, hunc magni Caesaris aula petunt.  
 Non tamen eripient hunc splendida munera, Regum  
 Hunc favor, hunc magni Caesaris aula tibi.  
 Lusiadis quoties linquens palatia Regis,  
 Et quas praebebit luxus & aula dapēs,  
 Optabit parcis sociorum accumbere mensis,  
 Et famulas mensis apposuisse manus?  
 Pauperibus quoties, raptas Magnatibus, aures,  
 Sontibus ut sanet saucia corda, dabit?  
 At quid ager, Caroli cum votis mota, parabit  
 Purpureos inter Roma referre Patres?  
 Caesaris ante pedes repetet lachrymansque gemensque  
 Juratam superis, & tibi Diva, fidem.

Vincet



*Vincet Amor Caroli : Pastoris jussa supremi  
Hunc poterunt claustris eripuisse tuis.  
Ne tamen aduersis desperes anxia rebus ;  
Magnanimo sedes pectore certa tibi est.*

Abbas D. Jo. Petrus Perinus Princ. Emer.




## STUDIUM SALUTIS ANIMARUM.



**D**iva fides, & divus amor simul axe sereno  
Respexere, facesque suas jaculatus uterque  
ALVARI inexpletos animis accenderat ignes ;  
Quanta per Hesperias fervent incendia terras.  
Et centum populos, & centum corripit urbes  
Flamma, sacri latè erumpens de pectore Mysta !  
Ite procul nigra, scelevum contagia, pestes  
Indecores Anima, damnataque nocte profundâ  
Monstra Erebi, ite procul, stygiosque reposcite luctus.  
Alvarus ignito pallentia in antra flagello  
Vos remeare jubet, regnisque faceffere Iberis.  
At simul Impietas sensit sibi tartaro ab imo  
Bella geri, impatiens superas evasit ad auras,  
Et latè Hesperia loca lumine circumspexit.  
Ut vidit divina iterum florescere sacra,  
Et conjuratum lustralibus ignibus orcum  
Disiectum, sanctisque Tagum exardescere flammis,  
Tum verò acta amens furis labra livida mordet,  
Et de gorgoniis avulsum crinibus anguem,  
Viscera pasturum, medio sibi pectore figit.  
Quod superest ( parva ingentis solatia luctus )  
Teque facesque tuas frustra vorvet, Alvare, diris.  
Sed tuus interea flammis vittricibus ignis  
Dedocet errantes, vitriataque pectora noxis  
Expiat, & resides animos, desuetaque pridem  
Corda virum, pulchro Cali succendit amore.

*Parte omni aspicias mediâ e testudine templi  
 Fixa tholis pendere sacra ad fastigia divum  
 Ivarumque fibras, fractosque cupidinis arcus,  
 Argentiue famem, divæ monimenta favilla,  
 Exuvias erebi tristes: rem carmina signant.  
 De monstis animi domitis, fractoque acheronte  
 Alvarus hac posuit Superis victoribus arma.*

Marchio D. Gaspar de Rosales ex Coll. Nobilium.



VIRTUTES ET RES GESTÆ  
 SANCTI FRANCISCI BORGIÆ  
 HISTORICÈ DESCRIPTÆ.



**P**ostquam felici Franciscum funere raptum  
 Faustior athereis intulit aura plagis,  
 Flevit Aventinus, flevit Capitolia, flevit  
 Ipse Thybris cari fata gemens capitis.  
 Aurea virtutum soboles orbata parente  
 Implebat Romam flebilibus numeris.  
 Quin etiam auratos modò spargere pulvere crines,  
 Et pectus manibus plangere pallidulis;  
 Et modò Francisci lachrymis urgere sepulchrum,  
 Et gemere ad mutos exululans cineres:  
 Tandem post longos (miserum solatia) fletus,  
 Hispanum repetit squalida turba solum:  
 Erravere diu passis per eburnea colla  
 Crinibus, indignas imbre rigante genas.  
 Sæpe udo consistebant in margine Batis,  
 Aut propter flavi litora curva Tagi,  
 Narrabantque suos ventisque undisque dolores:  
 Commiserat tristes ventus & unda Deas.  
 Donec post varios casus, noctemque profundam  
 Attulit optatam lux inopina diem.

*Accidit*



*Accidit ut notas audires, Alzare, voces,  
 Et querulos, cœtus quos dabat ille, sonos.  
 Condolet afflictæ tua sic clementia turba,  
 Ut dare deproperes, quam bona poscit, opem.  
 Vivite felices, pia vivite turba, Sorores,  
 Mox etiam vester Borgia vivet, ais.  
 Victuris subito, Princeps, per sacula chartis  
 Aggrederis raptum pingere Borgiadam;  
 Et non mortales mortali in imagine vultus,  
 Et similem magnis frontem habitumque Diis.  
 Deinde animum reddis caelestem, Et numine plenum,  
 Cordaque non ullis tacta cupidinibus.  
 Stat sua quæque loco virtus, atque ordine pulchro  
 Fungitur officiis ista, vel illa suis.  
 Vidit opus Calum, fixumque in imagine, vix non  
 Sedibus ereptum credidit esse suis.  
 Mors pariter vidit, similique errore laborans  
 Heu jam sanguineas vix tenet atra manus.  
 Deceptam risit deteriso lumine virtus,  
 Namque operi æternum vivere fata dabunt.*

Archangelus Jovius:



SAL:

## SALMANTICENSE MAGISTERIUM.

**E** Rige laurigeram, felix Salmantica, frontem,  
 Et latare novum media inter sidera Solem.  
 ALVARUS hispanis memorabile nomen in oris,  
 Ingenio par, & studio, doctissimus unus  
 Arcanas rerum meditando extundere causas,  
 Quaeque obscura latent sublimi evolvere mente:  
 Nec modò natura pervadere viscera solers;  
 Sed fidei cacos aditus, penitusque repositos  
 Caestis sophia prudens penetrare recessus,  
 Velatamque Dei sacrâ caligine mentem,  
 Atque exploratum sine nube docere Tonantem,  
 Accedit vestra columenque, decusque minerva.  
 Aspice quantus honos fronti, quantum instar in illo est.  
 Legit in hoc sibi mansuram sapientia sedem,  
 Et facili primas venientem lucis in auras  
 Lumine respexit, gremio complexaque, labris  
 Ubraque immulgens, divinum preffit in ore  
 Nectar, & excelsa dedit ignea semina menti,  
 Aflavitque pares animos praestantibus ausis.  
 Quas Stoa, quas Memphis siluit, dabit Alvarus artes;  
 Et quae Cumeumque adytum, cortinaque Phabi,  
 Delphorum tripodas, Dodoneique lebetes  
 Non docuere, docet: credas oracula Divum  
 Quae responsa refert cedro dignanda perenni.  
 Jam nunc Austriaci hoc sidus tibi Caesaris Aula  
 Invidet, & duplex festinat habere Tiara;  
 Et Vaticanus, merces amplissima, Murex  
 Hujus ab immensâ properat splendere luce.  
 Quis tibi tum sensus, quis honos Salmantica? quae tum  
 Gaudia erunt, cum dardanio spectabilis ostro  
 Dividet excelsas in publica commoda curas?  
 Purpureique Patres, & maximus Urbis & Orbis  
 Illius angustâ fulgebit luce Senatus?  
 Quanto tum felix tua se se Academia plausu  
 Extollens, alias inter longè altior ibit?

Comes Gaspar Padus.

ÆNIM-



# ÆNIGMA THEOLOGICUM<sup>27</sup>

## SEU LIBRI DE TRINITATE.

Alluditur ad Programma illis præfixum.



U<sup>N</sup>de hic unde novus Tibi mentem infederit ardor,  
Ut cacos aditus, Divûmque arcana subires  
Impavidus, densasque implexi Ænigmatis umbras  
ALVARE, quis dederit Tibi tanta ad munera vires,  
Vestigare jurat; quanquam hac non hætenus ulli  
Explorata, tamen non sunt impervia Musis.  
Viderat etherea Superûm Regnator ab arce,  
Quàm latè fureret, quantas daret horrida clades  
Hæresis, interitum fidei minitata vetusta.  
Ergo qua Cæli secreta in parte coruscat  
Purius, & rutilis flammantior aula pyropis  
Ardet, inaccessusque humanis visibus horror;  
Concilium immortale vocat. Chorus adsuit omnis.  
Adsuit æterno fulgens Sapiëntia Sole,  
Justitia, & Pietas, casusque Pronæ futuros  
Qua regit, & rerum effectrix Suprema Potestas.  
Tum Genitor solio Divas ita fatur ab alto.  
Dira Phalanx stygiis jamdudum erupit ab umbris,  
Infausto Superos jurata laceßere bello.  
Jam prope se partes circum diffudit in omnes  
Exitium, flammæque ferens. Jacet obruta passim  
Religio, palmasque gemens ad sidera tendit.  
Nec satis est nostro per fraudem ævertere gentes  
Obsequio, & fixas per vim rescindere leges,  
Et terras miscere, novosque extundere ritus  
Invisos, templisque meos arcere ministros.  
Nos quoque, nos petimur, nobis hæc monstra minantur.  
Primus inaudito mihi bella Sabellius ausu  
Intulit, e gremio natum rapuisse paterno  
Haud veritus, tum me non re sed nomine Patrem  
Dixit, & ex utroque fluentem extinxit amorem.  
Quas non inde novas Lybicos excivuit Arius

Per

Per populos turbas, dum Natum Patre minorem  
 Finxit, factarum primum licet ordine rerum?  
 Quid Paulum, Faustumque loquar, turbamque sequutam  
 Audaces ad bella Duces, nostraque paratos  
 Perdere si liceat decus immortale corona?  
 Æternis sedenim damnata hac monstra tenebris  
 Jam pene exciderant, jam pene oblita jacebant.  
 Cum novus Arctois turbo violentus ab oris  
 Incubuit, referens jam detestata priorum  
 Dogmata, nequidquam cultu donata recenti.  
 Jamque iterum vomit antiquum redviva venenum  
 Hæresis in vulgus, rursusque Sabellius ore  
 Serveti furere, atque referre Socinus Arium.  
 Non impune tamen; quas non post crimina clades  
 Senferunt miseri, meque indignante tulerunt?  
 Sed nihil his actum est; etiam post fulmina pestis  
 Serpit, adhuc victrix, nostrisque interrita telis.  
 Ergo qua nostra steterit sententia menti  
 Accipite. Ultrici quando satis hæcenus ira  
 Justitiæque datum est; Te nunc, Sapientia, cæcis  
 Insolitas inferre facies, mentisque tenebras  
 Dispersisse decet; radiis fortasse novellis  
 Submittent faciles se se, lucivæ rebelles  
 Ipse reluctantes pudor, aut nova fulmina cogent.  
 Hac Pater, Assensere omnes, plausumque dedere  
 Adstantes Diva, tum se Sapientia Cælo  
 Demisit, patrios complere ex ordine nutus.  
 Tempus erat quo sublimi super æthera mente  
 ALVARUS, humanas despectans undique curas,  
 Divinarum aditus rerum, sacrosque recessus  
 Lustrabat reCOLens, densoque abscondita velo  
 Arcana, & fidei mysteria cæca superna.  
 Scilicet æterni non enarrabile Patris  
 Quæ Verbum ratione fluat, quem spiret uterque;  
 Alternis se se dum contemplantur, Amorem  
 Attonito similis spectans, & pronus adorans.  
 Ah Pater haud ulla manans ab origine Numen!  
 Ah Nate ingenti soboles æquæva Parentis!

Ah



Ah amor, & Patris, Natique è Numine Numen !

Talia dum memorat lux improvisa loquentis  
Perstrinxit fulgore oculos, totamque pererrans  
Insolito pavidam pervasit lumine mentem :  
Ipsa aderat, tantamque dabat Sapientia lucem  
ALVARE de Calo, tecumque bis vocibus usa.

Nostra viden quanta lateant mysteria nocte ?  
Hanc noctem, has tenebras objecta luce fugare  
Fas Tibi, sic jussit Pater, & diducere velum,  
Quo tegitur Numen, cacosque resolvere nexus.  
Ne dubita ; Tibi terna aderunt ad tanta Sorores  
Munera, queis Divum labor est exponere mentem.  
Ha quamvis vario soleant incedere cultu  
Nec semper sentire eadem ; licet acria secum  
Bella gerant, pulchro tamen omnes fœdere junctæ  
Quaque Tibi præstabit opem, audentemque juvabit.  
Ipsa etiam, ipsa pares supplebo ad grandia vires.  
Tu modo qui gemino se se indistincta propaget  
Allapsu Natura doce, quin pluribus obstet  
Esse unum, Natumque Pater quo more feraci  
Juge queat genuisse sinu ; qui Natus eadem  
Natura cum Patre potens, dum mutua se se  
Respiciunt, spirent quo ardent feliciter Ignem.  
Hæc doceas : tum se se iterum si tollat ab orco  
Monstrum horrendum informe ingens, claramque recuset  
Aspicere in lucem ; stygius si sibilet anguis  
Atque venenato minitetur vulnera morsu  
Tum Tua Vox divum resonet, verumque per auras  
Ingeminans Numen, centeno fulminet igne.


Hæc olim Tibi jussa tulit Sapientia Calo.  
Ex illo qui se plausus, quæ fama sequuta,  
Dum Triadis secreta aperis, nodosque resolvīs  
Vidimus, & nunquam satis admiranda, videbunt  
Post alii. Et ne forte olim, qua luce magistrâ  
Scripseris hæc, tantique Tibi moliminis author  
Quis fuerit, tenebris involvat sera vetustas,  
Cuncta Tuo inscribi voluit Sapientia libro.


Joseph Coffa ex Coll. Patellanorum Princ. Emer.

IN

שיר

בצוות אל העם תורה  
 על-הר סיני רב גבה:  
 ירד אל כי הלפירים  
 בתוך הענן וברקים:  
 ותקע בשופר מאד  
 לרעוד כל-הר ופחד:  
 אז בני ישראל ראו  
 יורד את-יהוה ורעדו:  
 יוצא משה כל-העם חוץ  
 אשר מן המחנה אוץ:  
 אז משה גבל כל-גזים  
 כאול יסר אלהים:  
 בתחתית ההר יתיצבו  
 ולא בקצה נבעו:  
 אבל כרר משה נגש  
 אל-הערפל ופגש:  
 כן אתה בדברך  
 אשר כותב בספרך:  
 רזין בארת רב אורים  
 אשר עוד לכל טמונים:





CUM Deus Isacidum ferret nova fœdera genti,  
 Ritusque monstraret sacros,  
 Adfuit excelsæ Sinai de vertice montis  
 Flammam inter, & tonitrua,  
 Divinum obductus densa caligine vultum.  
 Cælo micabant fulgura  
 Interea, atque atrâ rumpebant nubila luce.  
 Educta castris agmina  
 Digerit in numerum, tribuitque ex ordine Ductor,  
 Certosque figit limites,  
 Quos transire nefas, propiusque accedere monti.  
 Clangente demum buccina  
 Solus inaccessam supremo in culmine Moses  
 Ingressus est caliginem.  
 Solus Divini tulit illic lumina vultus,  
 Verbisque verba reddidit.  
 Non aliter densas dum cæci anigmatis umbras,  
 Et implicata nexibus  
 Ignotis arcana subis, totumque loquendo  
 Numen revelas, *ALVARE*;  
 Stant alii procul, & tanta mysteria lucis  
 Mortalibus non pervia  
 Mirantur, nec adire audent, pavidoque latentem  
 Deum colunt silentio.

Comes Petrus Paulus Arrigonus ex Coll. Nobilium.





## LEGATIO LUSITANICA.




Quid rapior? trans Herculeam feror, *ALVARE*, metam,  
 Trans *Abilam* & *Calpen*, quâ *Lusitana* superbit  
 Regia, quâque suis sedem sibi *Carolus* armis  
 Legerat, *Hesperiiis* cum martem adverteret oris.  
 Oh quis te curis, oh quâ te mole laborum  
 Vallatum hîc video! non si tot machina rerum  
 Urgeat *Alcidem*, fuerit par ille ferendo.  
 Nempe tibi rerum cum primùm summa potestas  
 Venit, & *Austriaci* tibi contigit, *Alvare*, Regis  
 Grande ministerium, sensisti qua tibi mole  
 Ingruerent turbæ, quid tristia tempora ferrent.  
 Huc siquidem properare suas jubet *Austria* turmas,  
 Huc etiam ad duras accita *Boemia* pugnas  
 Magnanimos bello *Heroas*, peditesque equitesque  
 Ductoresque vocat. Viden ut *Germania* toto  
 Naviget Oceano? Te scilicet omnia solum  
 Respiciunt, nutusque tuos latè agmina servant.  
 Quis tibi tunc animus fuerat, quæ dextera, quæ mens,  
 Tota licet streperet, tremereque *Europa* tumultu,  
 Teque etiam circum ferverent *Oppida* bellis?  
*Anglia* si turmas, si mille *Baravia* puppes  
 Expedit auxilium *Carolo*, tua dextera classi  
 Signat iter, monstratque viam, qua sospite cursu  
*Prædonum* insidias, inimicaque lumina fallat.  
 Si labat inde fides percussi fœderis, ipse  
 Primus ades, quaque arte vales pactumque fidemque  
 Afferis ante alios, partem vigil *Argus* in omnem.  
 Scilicet his curis, ceu fomite, pascitur illa  
*Mæcenas* vis illa tua vis ignea mentis.  
 Jam *Lusitano* de littore plurima pinus  
 Solvit, & ad ripas velis contendit *Iberas*  
 Auspiciis firmata tuis: pars altera classis

Fæta auro, fæta annona; pars are coruscat  
 Et clypeis galeisque, & lecto milite, Regi  
 Suppetia Austriaco; pelago quas dum videt imo  
 Nereus, an redeant, hæret, miracula Cadmi,  
 Lusiadum-ne recens se voluat Nilus in agros.  
 Quamquam suppetias dum contemplamur euntes,  
 Vidimus Hesperia, quâ se Tagus aquore mergit  
 Turmatim populos ruere, & te poscere votis.  
 Mixtus Eques plebi tectis migrat exul avitis,  
 Pallidus, ager, inops, post tot dispendia belli  
 Poscit opem, duraque petit solatia sorti.  
 Felices anima! siquidem majoribus omnes,  
 Albare, per te opibus, per te splendoribus aucti  
 Dulcius exilium tectis sensere paternis.  
 Sic & suppetiis Regi, dum fulminat armis  
 Hesperiam, sic & miseris ades unus amicis  
 Albare muneribus, par Albare pluribus unus.  
 Herculeas metam ratibus mentita columnas  
 Fama vetus: Quid fama recens de te ferat, audi.  
 Meta sit humanis jam posthac Alvarus ausis.

Carolus Strada.



## VATICANA PURPURA.



Nondum-ne votis flecteris, *ALVARE*,  
 Communibus? Nec dimoveant loco  
 Te *Casaris* nutus? *Diu-ne*  
     *Romuleo* fugies ab ostro?  
*Firmant* tenacem propositi virum  
*Usque* & preces & vota. *Diutius*  
     *Non ergo* cessabit *supremi*  
     *Imperium* arbitri; & annuentem  
*Sed* serò votis excipiet pia,  
*Aucto* triumpho, pœna licentia,  
     *Agnosco* fatum: *Vaticano*  
     *Intonuit* Deus ecce *Calo*.  
*O ille* pulchrâ latus adorea  
*Dies!* *Latinâ* cum *Alvarus* ingemens  
     *Sub* purpurâ, victusque victor  
     *Romuleam* ingreditur *Urbem*;  
*Interque* *Patrum* gaudia, consonos  
*Interque* plausus jam *Capitolii*  
     *Ad arduas* ducetur *arces*.  
     *Ausonia* venerandus *Aula*  
*Succede* Princeps. *Hæc* penetralia  
*Lingua* disertum, consilio parem  
     *Miventur*; *Augustus* loquentem  
     *Attonitâ* bibat aure *Cætus*.

Marchio D. Hieronymus Talenti Florentia  
 ex Coll. Nobilium.



RE-



RELIGIOSISSIMI PRINCIPIS<sup>35</sup>

Splendor, & Moderatio.




**A** Stitit hinc facili contenta Modestia cultu,  
Majestas titulis inde, opibusque potens;  
Pugnabant amba studiis discordibus, ornet  
An magis hæc mores, *ALVARE*, an illa tuos.  
*Æqua Themis pulchram componat ut arbitra litem,*  
*Sistat, ait, se oculis utraque Diva meis.*  
*Sed postquam titulos, grandesque Modestia gazas*  
*Inter, regali visa nitore micans;*  
*Utque supercilii Majestas nescia, cultu*  
*Simplici, visa suum dissimulare decus:*  
*Fallor, an in Divam duplex Dea transiit unam;*  
*Fallor, an in duplicem transiit una Deam?*  
*Hæc Themis aqua, pares spectans in dispare Diva*  
*Mores: Et lis sub judice pendet adhuc.*

Abbas D. Gaspar Talenti Florentia ex Coll. Nobilium.



EPIS-



Εἶθε Σιρακοσίαισιν λύραν προσέτ' ἔχετ' αἰοιδῶ·

Αἰτινά μοι βᾶνοι κλάϊοιτε, καὶ Ἀΐδιος ὕδωρ.

Αἰλινά μοι βῆνοι κλάιοιτε, καὶ Ἀΐκιδος ὕδωρ.

Αἰλινά μοι βῆνοι κλαίετε, καὶ Ἀΐδος ὕδωρ.

PA-



**V**Os quoque Sicelides *Aetna* de vertice *Nympha*,  
*Siqua* *Syracosi* *Pastoris* *fistula* *vestris*  
*Spirat* adhuc *sylvis*, *memores* *mibi* *dicite* *diva*,  
*Quos* *gemitus* ( *audistis* *enim* ), *quas* *vallibus* *istis*  
*Multa* *querens* *lachrymas* *Catana* *sacra* *Nympha* *cievet*.

*Illa* *sibi* *erepto* *nuper* *Pastore* *dolebat*  
*Mœsta* *sedens* *gelidum* *frondentis* *ad* *Acidis* *amnem*  
*Narrabatque* *suos* *sylvisque*, *undisque* *dolores*.

*Flete* *meis* *sylvæ* *lachrymis*, *flete* *Acidis* *unda*.  
*Alvarus* *has* *valles*, *hæc* *culmina* *Pastor* *amabat*;  
*Et* *procul* *Aufonia* *quamvis* *detentus* *in* *urbe*,  
*Ipse* *suum* *presens* *animo* *ducebat* *ovile*,  
*Et* *vigili* *cura*, *patrioque* *regebat* *amore*.  
*Nunc* *silet* *omne* *nemus*; *Pastorem* *nuper* *ademptum*  
*Herbiferi* *colles*, *vallisque* *queruntur* *opacæ*.

*Flete* *meis* *sylvæ* *lachrymis*, *flete* *Acidis* *unda*.  
*Hoc* *Pastore* *gregem* *placidus* *spectabat* *Olympus*,  
*Lataque* *Cœlesti* *stillabant* *gramina* *rore*.  
*Quin* *etiam* *frondens* *sylvæ* *hæc*, *atque* *humida* *vallis*  
*Cœlicos* *quoties* *exceperat* *hospita* *divos*?  
*Vidi* *ego* *solliciti* *cum* *nutu* *Præsulis* *omnes*  
*Divus* *amor* *campos*, *sylvasque* *invaderet* *omnes*.  
*Dum* *varia* *montes* *cingens* *indagine* *prædam*  
*Retibus* *hinc*, *jaculis* *illinc* *urgebat* *acutis*.  
*Quem* *circum* *accinctæ*, *Venatrix* *turba*, *Sorores*,  
*Candida* *Simplicitas*, *mendacis* *nescia* *fraudis*,  
*Huic* *comes*, *Et* *duris* *veniens* *Patientia* *rebus*,  
*Religioque*, *sequens* *vultu* *Spes* *lata* *sereno*,  
*Mille* *jugis* *divæ* *glomerantur*, *Et* *antra* *laceffunt*.  
*Improvisa* *polo* *cum* *vox* *delapsa* *per* *auras*  
*Detulit* *amissum* *Pastorem*: *protinus* *omni*  
*Turbatum* *sylvæ*: *tristis* *chorus* *omnis* *ab* *armis*  
*Cessit*; *Et* *è* *summo* *gemuerunt* *vertice* *Nympha*,  
*Aliger* *ipse* *puer* *mærens* *Et* *tristibus* *errans*.



*Crebra gemit dumis, & rupibus in desertis.*

*Flete meis sylva lachrymis, flete Acidis unda.  
Ipsa etiam divi pulcherrima mater amoris  
Alma Fides gressum per devia lustra ferebat  
Clavior, & nebulis cœu candida cynthia pulsis,  
Caperat insolitam vultu diffundere lucem,  
Sylvarumque sinus, tacitoque subire recessus.  
At vitrei nuper viridem dum fontis ad oram  
Agrestem traheret turbam, ac divina doceret,  
Aspexit subitam descendere montibus umbram,  
Exclamatque, sinus palmis percussa decoros:  
Alvarus hos fontes, hæc Alvarus arva relinquit.*

*Flete meis sylva lachrymis, flete Acidis unda.  
O Ætnæa lupi quicumque hæc lustra tenetis,  
Thoes, & o duris crudeles dentibus urfi,  
Non ego vos ultra pecoris secuta timebo;  
Alvarus hic regnat; satus est; vos ite sub umbras,  
Ite fera; in cæcas vos impulit ille latebras.  
Talia jactabam vitiis elata subactis;  
Cum subito (miserum!) formas ululare luporum  
Audivi; thoesque, & sævi dentibus urfi  
Decurrere jugis, gemitumque in valle dedere.*


*Flete meis sylva lachrymis, flete Acidis unda.  
Urbs mea Sicano fortunatissima nuper  
Littore, quæ tanto tollebas Præsule frontem,  
Et reliquas puris vincebas moribus urbes;  
Dic, age, qualis honor superis, qualisque micabat  
Majestas Templis, & sacras fulgor ad Aras.  
Plus tamen ornabant digni sua templa Ministri,  
Plus Populi pietas, poterat quibus, Alvare, sensus  
Inspirare tuos, sanctasque inducere leges.  
Urbs modo Sicanis flebis tristissima ripis,  
Qualis & ignivomis dum detonat Ætna cavernis,  
Mæsta vides rapidis populatos ignibus agros;  
Qualis & horrifico terra concussa tremore  
Errabas turres, convulsaque mœnia circum,  
Et super ipsa tuas lachrymabas ægra ruinas.  
Talis erat luctusque tuus, mærorumque tuorum,*

*Romu-*

*Romulidum tristis veniens cum rumor ab urbe  
Vultus atque animos jactura implevit amara.*

*Flete meis sylva lachrymis, flete Acidis unda.  
Alvarus urbis honor, felicit pastor ovilis,  
Pauperibusque pater, rebusque levamen in artibus.  
Non ita plena meis voluntur flumina terris,  
Seu ferat in praeceps torrens Amanenus arenas,  
Seu magno Simethus agris se se intuebat amne;  
Non ita mutatus liquidas fugis Acis in undas,  
Pauperiem ut Siculis ditaverat Alvarus oris,  
Aurea munificâ diffundens flumina dextra.  
Hac ego nunc memorans luctu consumor acerbo;  
Nunc lachrymas fundo: Quod si discedere ab istis  
Littoribus possem, liquidumque innare per aquor  
Sicut & Alpheum fugiens Arethusa sequentem  
Doridos intravit sedes animosa marina,  
Non dubito, enassem Romani ad littora Tivris,  
Et Vaticani conscendens aurea collis  
Limina, Pastorque pedes amplexa supremo  
Orassem, lachrymas fudissem, pallida vultu  
Tentassem mæsto; ne caro orbata Parente  
Regrederer; precibusque meis fors ille dedisset.  
Quod si fata meis fuerant contraria votis,  
Et te tantus honor Regalis Nympha manebat,  
Erepti saltem petissem Praefulis Aedes,  
Ut daret optatos peregrina cernere vultus,  
Osculaque emerita supremum figere dextra.  
Flete meis sylva lachrymis, flete Acidis unda.*

Comes Petrus dal Verme.



MONS.

## MONS-REGALIS

Datum sibi Archiepiscopum gratulatur.

O Pastor, soboles, amorque Divum,  
 O & praesidium, decusque nostrum,  
 Gregis delictum beatoris,  
 Quem rector superum serenus, urna  
 Sortitus nivea mihi volenti  
 Et sponsum dedit, & dedit parentem;  
 Dum te fama volans citante pennâ  
 Quâ Calpen mare pulsat astuosum;  
 Quâ Suevos gelida tegunt pruina,  
 Et Istro rapido, sacroque Tybri  
 Concessum mihi caelum favore  
 Et sponsum canit, & canit parentem.  
 Quot gentes, superi! quot è remotis  
 Movit sedibus illa Civitates,  
 Ut laudem canerent meo Parenti,  
 Ut sponsa canerent Hymen sorori?  
 Jam, quamvis sedeam iugo virenti,  
 Nec turrita nimis, nec ampla multum,  
 E ripis caput erigo Sicantis;  
 Me circum modo pendet, invidensque  
 Plaudit nobilium urbium corona.  
 Illa magnifica, frequentiores,  
 Florentes opibus, potentiores,  
 Diversa genioque moribusque,  
 Uno me tamen ore prædicabant  
 Tuis auspiciis, tuoque amore  
 Florentem nimium, nimis beatam.  
 Sed tantis ego plausibus modeste  
 Leni gaudia temperans querelâ  
 Dolebam, quod amantis ora Patris,  
 Pastorisque, quod anuli decori  
 Ornandam viridi manum smaragdo  
 Nec videre licet, nec osculari.  
 Hoc desiderium levare cuncta  
 Ut testes oculis suis parabant.

Fron-



Frondenti caput impedita lauro  
 Tunc Salmantica, Barcinoque fortis;  
 Tunc & Vienna potens, Ulyssipoque, &  
 Roma principe fulgurans Tiarâ  
 Certabant habitum, tuosque vultus,  
 Et dotes animi suavioris  
 Qua laude exprimeret magis disertâ.  
 Nostris altera dixit in lyceis  
 Hoc vidi sapientiam magistro  
 Claro currere fonte claviorem.  
 Ripis, addidit ista, Lusitanis  
 Solantem miseros, opemque vidi  
 Profusâ exulibus manu ferentem.  
 Sed non degeneres ego dolentis  
 Fletus, Vienna refert, in ore vidi,  
 Longâ cum prece Carolo reluctans  
 Ostri respueret decus latini.  
 Non vicere preces, secuta Roma est,  
 Hunc vidi, videoque Purpuratos  
 Inter conspicui Patres Senatus  
 Curis, consilio, vigore mentis,  
 Virtute, officiis, amore recti,  
 Effusâ faciliq; comitate  
 Tot dives radiis jubar micare.

Dum laudes canit hæc, & illa: turbâ  
 Processit mediâ Sicana nymphe,  
 Quæ sub flammivomâ latebat athnâ;  
 Amplectensque sua manum sorori,  
 Quem nobis rapuere fata, dixit,  
 Pastorem vigilem, pium parentem  
 Concedi tibi nymphe gratulamur.  
 Qui sit forte rogas: fatebor, illum  
 His tecum siculis remota ripis  
 Non vidi: ille tamen mihi vel absens  
 Quam charus fuerit loquar. Loquentis  
 Hic voces dolor impedit, disertisque  
 Uberrim lachrymis rigavit ora.

Comes Ludovicus Siccus Suardus ex Collegio Calchorum Princ. emer.

LE-

## LEGATIO ROMANA.



O Diva leta pulchrior iride,  
 Qua dira terris praelia dimoves  
 Pax principum praesens potentum  
 Nectere perpetuos amores,  
 Irâ nec ullâ dissociabiles,  
 Descende Cælo; te placidis vocat  
 Festivus undis Tibris, alta  
 Te Latii dominantis arces.  
 Clarus recentis fideve purpure  
 Felixque regum jungere fœdera  
 Nunc Caesaris Legatus Aulam  
 ALVARUS ingreditur latinam.

Hic ille custos scilicet, aureo  
 Quem destinabas provida vinculo,  
 Quo principi jungis Tiara  
 Imperium, Carolumque Magno  
 Orbis parenti. Nodus amabilis!  
 Quem lata spectent lumine sidera,  
 Nec gemmea gazis Erythra  
 Nec gemino redimendus Indo.

Custode Cælo nodus, et Alvaro  
 Custode dignus; quo stetit Imperj  
 Immota vis, quo cultus aris  
 Floruit intemeratus, hostes  
 Contra rebelles, Cernis ut impius  
 Horrenda rictu sanguineo furor  
 Frendat, sacri si fortè possit  
 Vincula dissociare nexus?  
 Frustra; Tibi dum creditur Alvaro  
 Hac cura, cauti cui vigor ingenj,  
 Ususque rerum, cui redundans  
 Eloqui famulatur annis.

Tanto

*Tanto sodales officio pares  
 Adduntur illinc Religio & fides  
 Jurata dudum Vaticano;  
 Hinc vigilem pietas adurget  
 Curam, & merenti debitus Austria  
 Amor, nec unquam Caesaris immemor.  
 Sic faustitas albis quadrigis  
 Austriaco volitabit orbe;  
 Sic & quieto Regna silentio  
 Leges supremi Præsulis audient;  
 Sic Caroli livor minacis  
 Fulmineum trepidabit enssem.*

Benedictus Homodeus.



In idem argumentum.

## COMUNIS BENEVOLENTIA.




**A**ureus ut primum tristes deterferat umbras  
 Phosphorus, & noctem vicerat illa dies,  
 Qua te Romuleam Legatum Caesar ad Urbem  
 Misit, & augustas jussit obire vices,  
 Errabat propter tiberini fluminis undas  
 Fama, & se medio sustulit axe volans,  
 Inflatique tubis, hæc, quæ polus audit uterque,  
 Dicitur aoniis concinuisse modis:  
 Nunc ò nunc Romæ stabilem concordia sedem  
 Figat, & eternâ pax coitura fide.  
 Tum Dea, quæ faciles animos sibi jungit amicis  
 Nexibus exevnit nubibus alma caput;  
 Ter circum Capitolia obit, ter candida risit;  
 Inde tuas, Princeps, constitit ante fores.  
 Quam fama ut vidit, pernicious ardua pennis  
 Hinc Rhodani, inde Tægi ad littora tendit iter;  
 Mox ad Lusiadas, mox vestras, Sarmatæ, ad arces;  
 Et pax, ingeminat, pax stetit alma Tybri;

Alva-



*Alvarus austriacos, virtutis premia, fasces  
 Tractat, & augustum munus in Urbe gerit;  
 Prævertensque scabras animis adrepere lites,  
 Qua prudens pollet dexteritate, vetat:  
 Hac ubi dicta dedit Populis Dea nuncia pacis,  
 Ad latias rediit fessa labore vias;  
 At subito erubuit, Mæcenas inclyte, factis  
 Cum sua conspexit dicta minora tuis.*

Antonius Gallarinus ex Coll. Calchorum,





# AD LAUREATUM.



## ORATIO.



Ot inter titulos, & argumenta tuarum laudum, quæ Oratorem circumstant, Sapientissime Laureate, nescit quo se convertat, quorsum evadat Oratio. Hinc splendidus apparatus, & rerum, nitor elegantissimus, symphoniaci musicorum, chori, festus Academiæ universæ plausus, & acclamatio; inde nobilissimæ, & eruditæ coronæ concursus par, & celebritas; decus sanè ingens, & dignitas Viri maximi, qui Purpurati Principis vices sustinet; ipsiusque in primis Eminentissimi Mecœnatis grande nomen; hæc, inquam, omnia in partem veniunt gratulationis meæ. Quare ut modum habeat oratio, laudibus tuæ Laureæ cæteris dissimulanter præteritis, unum illud persequor longè maximum; gratulor tibi scilicet amplissimum Mecœnatem, & quàm jure optimo ejus patrocinio fruaris, paucis ostendo.

Atque ille quidem habet numeros Mecœnatis omnes, & partes implet. Peracre ingenium, lautà, & locuplete eruditionis multiplicis suppellectile prolixè instructum, exquisitum judicium litterarum, Litteratorum æstimationem æquissimam, perceptionem sanctissimæ hujus facultatis intimam, & ejus reconditoris doctrinæ, qua in Salmanticensi Athenæo, Emporio illo Scientiarum, perdiù evolvendâ uberri-  
mos legit admirantium plausus. Quid si adjiciam excelsitatem animi quandam, sese nonnisi ad summa ferentis, munificentiam vetere illo Mecœnate apud Augustum potentissimo dignam, prudentiam, dexteritatem in arduis lubricisque negotiisque delicatè, & suspensâ veluti manu tractandis, quasque

que omnes in eo dotes Roma, illud amplitudinis, dignitatisque domicilium miratur? An non rectè facere videor, qui tantum tibi auspicem gratulandum putem, Sapientissime Laureate? Porro si vestrum quis à me postulat, Auditores, quid fecerit Laureatus, Eminentissimum Mecœnatem suæ Laureæ conciliaturus, Plinianum illud respondeo, nihil aliud fecit nisi quod meruit. Meruit Purpurati Principis Patrocinium præstans Clientis hujus Sapientia, & spectatissima Pictas, quam utramque satis pro dignitate explicare non possum. Exhibe Braydenfis Academia, exhibete Partheniæ Sodalitates tabulas, annalesque vestros. Extant in illis scilicet vestigia abs Laureati sapientia, & pietate non pressa, leviter ad exigui prædicationem temporis, sed altè infixæ ad memoriam nominis immortalem. Nam, quod attinet ad sapientiam, nunquam tu verò contentus levis superficie doctrinæ, hæere affixus eruditæ chartis, impalescere libris, excubare avidissimè in occasione omnes rei tuæ litterariæ cumulandæ, nunquam feriari, nunquam cessare, vel indè maxime, quod ait Seneca, ingenuum animum, & ad rerum fastigia natum, te probans, quòd labore nutriris. Et quamquam elucere in te dicebatur micantior ad politiores litteras indoles, graviora tamen ad studia Philosophiæ, ac Theologiæ traductum, ubique vidimus te tui similem, ubique summum. Ac videte, Auditores, quàm nihil adulterinum veritati affingam; apertè prædico, præque me fero solitum esse Laureatum severioribus hisce studiis aliquid interferere otii, & laxamenti. Quid verò illud tandem? Delectatur breviusculis excursionibus in amoenissimas Pindi regiones; ibique regustat ex intervallo pœseos latices, adeò dulces olim & familiares. Quam demum esse putetis illius Sapientiam, cujus unis oblectamentis mortalium multi & habentur, & sunt doctissimi; aut quem digniorem Amplissimo Cardinali Clientem, quam illum, cujus vel recreari sapere est? Hæc verò, ut magna sint, & tanta, minoris tamen arbitror æstimanda, si cum pietate, cæterisque animi tui virtutibus conferantur. Comitatem loquor, & humanissimam morum facilitatem, quæ summis æque atque infimis acceptissimum facit; perpetuum religiosæ vitæ ductum, quem nulla deterioris exempli



pli vis & illecebra inflexit; libertatem benè agendi quandam, nec præposterà verecundiâ timidam, nec tumidam jactantiorē sui æstimatione; eximium Deiparæ vel à teneris cultum, studium propagandæ Religionis acerrimum, eloquentiam planè auream cum apta rerum, ac verborum dignitati, vocis, & corporis conformatione. Quantum est illud ad commendationem tuæ pietatis insigne, quod pœseos, quæ excellis, clarissimæ venam nisi sacra in argumenta nunquam derives? Quantò illud etiam illustrius, quòd in hoc flore, adolescentiæ sacris jam è rostris cum plausu, & dignitate, perores, cædibus olim magnis vitio inferendis proludens? Dabis veniam, Sapientissime Laureate, si exclusus angustiis temporis, ut sit in brevibus tabellis, & punctim fermè descriptis, non res tuas omnes cum laude gestas, sed rerum velut apices auditoribus exhibere cogor. Ut maximè persequar & tuum apud Rhetores Principatum, & cætera pietatis, ac sapientiæ decora, quibus te ornavit Braydenfis Academia, nullam dicam laudem ampliorem illâ, quam hodierno die ab auspiciis Mecœnatis Eminentissimi consecutus es. Unum hoc decus instar est omnium, quæ de te meritò prædicari possunt. Major hinc gloriæ cumulus, major tibi apud omnes existimatio accedit, quòd Purpuratus Princeps non hac modo die breve tuæ Laureæ commodat patrociniū; sed te olim semper in fidem, ac clientelam accipiet, & amplissimo nomine tueri impensè perget. Dixi.


Die 31. Julii 1726.


I M P R I M A T U R

*F. Bernardus Maria Cimegotti Sacre Theol. Prof. Ord. Præd., Sancti Officii Mediolani Commissarius.*


*Franciscus Curionus pro Eminentissimo, & Reverendissimo D. D. Cardinali Odescalco Archiepiscopo.*

*Gallarinus pro Excellentissimo Senatu*









Special 89-B  
folio 16459  
BX  
4705  
C56E96  
1726

THE GETTY CENTER  
LIBRARY



